

陶雲汀先生奏疏

奏疏卷三十目錄

江督稿

安化陶澍

敬陳淮鹽積弊情形摺子

請刪減浮費停緩攤補摺片

委署運司摺子

籌款興挑孟瀆等河摺子

蘇撫會稿

藩司告請終養摺子

會籌兩淮鹽務大概情形摺子

欽差會稿

積歉之區請來春接濟口糧摺子

蘇撫會稿

江淮各屬熟田舊欠請分別緩徵摺子

蘇撫會稿

兩淮運庫墊估虧缺緣由摺子

會稿 欽差

會籌鹽務章程摺子

會稿 欽差

委臬司兼署藩篆摺子

敬陳淮鹺積弊情形摺子

奏爲淮鹺疲壞已極縷陳積弊情形請

旨飭查辦理藉資補救仰祈

聖鑒事竊照兩淮鹽務關係

國帑臣頻年在蘇已聞其疲敝情形日甚一日但

不料山窮水盡竟至如是之極固由院司屢易

漫無責成因循諉卸各顧目前而庫貯旣空奸

商無可咀嚙遂成渙散臣細加察訪其來有自

亦不起於近日查淮商向有數百家近因消乏

僅存數十家且多借貲營運不皆自己貲本更

有以商爲名網取無本之利並不行鹽者以致
利衰引滯向係兩年三運今乃一運兩年愈遲
愈積月利愈虧而商人習慣淫侈率多醉生夢
死之徒不知自行經理惟任商夥商廝編擺作
弄朦混侵吞以致日形竭蹶其岸引所以滯銷
者一由成本積漸成多一由藉官行私過甚查
成本之輸於官者爲科則有正項雜項外支帶
款等名目用於商者有引窩鹽價捐壩運費辛
工火足等名目此外應徵雜支各款尙多而外
銷活支月摺岸費等款皆總商私立名目假公

濟私詭混開銷種種浮費倍蓰正課統名爲成本歸於鹽價以致本重價懸銷售無術轉運愈滯積引愈多不得已而銃銷一年讓出本綱地步作爲分限攤補且每綱支解之款不能停緩復將上綱下綱徵收之銀通融借墊輾轉挪用屢銃屢積更於科則之中帶徵帶補逐漸愈增此成本所由積重也私鹽充斥固應首重緝私然岸銷之滯不盡關梟販其商運官引之重筋與裝鹽江船之夾帶實爲淮綱腹心之蠹在商人於正鹽之外本有耗滿無課之加筋卽無異

官中之私而又有包內包外之私其包內者係運商捆鹽出場多帶重餉商廝商夥亦復如之且又短發江船水腳以鹽餉私抵船價其短發所給之價復被廝夥埠頭等勒扣過半甚至船戶不領腳價轉以重賂向商廝埠頭等圖謀裝鹽下至商宅之婢役亦月有饋費彼江船何苦爲此無非藉公裝私而已聞江船裝鹽每捆解放私鹽謂之買阻每船裝官鹽十之五六餘艙盡以裝私謂之跑風船旣裝鹽將全引一船之鹽分爲三四船遇有一船遭風失淺卽捏報全

引淹銷將並未失事之二三船亦請補鹽既得
照例免課又得通綱津貼到岸之後併得提前
先買謂之淹銷補運是以一引而換數引明目
張膽之私也及抵漢岸商人擡價居奇停船挨
買謂之整輪以窄徑自窘而私販轉得暢行迨
窮年守候銷售無期於是在後之船鑽營以提
前其黠者將待輪之鹽偷買俟輪到時買私補
填謂之過籠蒸糕甚至鹽已買盡仍報淹銷將
船整沈以減其偷買之跡謂之放生各種弊竇
皆起於整輪不但擡價實便售私此又藉官行

私之爲害也引旣不能年銷年額課焉能年清
年款從前章程本爲虛立而且虛稱報効無非
分網壓派之爲虛報奏銷更啟懸墊挪移之漸
前網懸墊後網復難挪補解餉無措於是遮掩
彌縫有預納減納貼色貼息之名或折減若干
作爲正數其貼色貼息亦於正數內少完若干
作爲加色加息之數商旣巧佔便宜而庫貯因
以短縮與州縣之虧挪何異其少納之數雖云
分網帶完然積欠已至數千萬前次清查或分
十五網帶徵或分三十網歸補長轉相承從何

徵納且以前商折減少納之課攤派後人彌補
李代桃僵偏枯孰甚以致殷商裹足不前正課
益懸而無着矣至於報効一款原係因公抒誠
得沾議敘自應各出已貲乃亦先由運庫墊解
分年帶繳積欠纍纍是庫存正款徒爲商人騙
取議敘之用而商捐之名適足爲消耗之目而
已以上數端弊起於商而利不在商商旣自敝
而課因以敝現在己丑之引行銷甫半庚寅年
尙未開網課細商刁浮僞百出造謠興誦不服
稽查興言及此可勝慨歎然銅弊旣深不得不

亟求補救之法臣之愚見謂宜計船裝鹽不畱空艙則受載有定數而夾帶易查矣實發水脚毋許尅扣則船戶不藉口而脚鹽易清矣遭風失淺之船准其補鹽不准免課則淹銷無所利而捏報自少矣嚴查水程俾銷數有準而無引之私自剔矣更宜大減浮費節止流攤以輕成本而恤運商以上各條應請

旨勅下鹽臣督同運司鹽道妥議籌辦實力奉行臣亦隨時稽查以資應助至於收買餘鹽減價敵私皆正本清源之上策而現似力尙未能惟有

口岸散輪則銷路暢而場窳自清食價平而民情大順私鹽不敢自靖無如商情固執但知目前搶跌微似有虧不知守候太久月利全無縱使每觔多買數文得不償失况過籠蒸糕沉船放火百弊由此而生於商大有未利不止於虧國課而病閭閻也查從前兩江督臣孫玉庭與湖廣督臣陳若霖籌辦散輪時於前兩月同到之船散買既畢再開後兩月之輪以散寓整最爲法良意美行之業有成效自道光八年冬底復改整輪未及二年而鹽務敗壞至此不可收拾

陸雲汀先生奏疏卷三十一
然則整散之效不待智者而始知矣應請

勅下鹽臣會同湖廣總督遴委廉正勤明之員查明
漢岸現在滯銷引鹽共有若干仿照前次散輪
之法辦理積滯庶可暢銷新綱始可發運以冀
稍有轉機漸還舊制臣爲鹺弊太深暫資補救
起見是否有當伏乞

皇上聖鑒訓示施行謹

奏

道光十年十月十六日具

奏十一月十一日奉到

硃批另有旨欽此同日承准

軍機處片知

貴督具奏鹽務摺片本日奉有

諭旨交

欽差王鼎會同 貴督查辦矣爲此知會

寶興

會同

貴督查辦矣爲此知會

請刪減浮費停緩攤補摺片

再者鹽務浮費與攤補二事最爲弊端不但虧
挪

帑項兼使鹽務日累日深愈無起色查兩淮行鹽
六省公事繁多辦公各費原不能無惟揚州每
綱額定七十萬兩已不爲少而總商以不敷爲
名每年竟多支八九十萬至百餘萬不等漢口
則謂之岸費每引帶徵六錢遞加二錢近聞每
引加至一兩四錢計每年亦一百數十萬此二
項共需銀二百餘萬真正課相等皆用於總商

之手無賬目可查詭混開銷每由庫內墊支而攤之於衆商歸補無期遂成虧欠其在揚州者多假借名目如新院到任修理衙署鋪墊什物一切所費不及數千竟開銷八九萬兩一手稟紅帖所費不過數十文竟開銷一千兩此二事經王鳳生查出始行減革他如月摺一項每年參養乏商子孫按月摺取銀亦用至十餘萬兩且續添未已此項開亦無甚實濟多入總商之手又如德音春臺二班頻年鹽務衙門並未演戲僅供商人家庭亦每年開銷三萬兩此外濫

費甚多竝有捏名冒支者如總漕總河巡撫各衙門從未解有緝捕犒賞之款聞亦每處開銷三四千兩其餘京外各官謊託可知若漢口岸費則多托名游客更屬無從稽考此等浮費每每託名辦公不敷濫支於本款之外列入成本攤徵是不敷二字乃爲總商巧混侵吞之護符也至於帶徵帶補之糾纏預納減納之套搭挪前移後無非以己身之虧欠嫁害於他人如積欠之四千餘萬欲分年彌補以數十年後之人代數十年前之人完欠固屬懸虛若帶徵雜項

按年卽須輸納內如帑利息本等款各處經費攸關核計子母爲度支所必需難以悉歸無著而本銀久化烏有今之納息者並非昔時領本之原商盡爲他人賠償如關規等利本係專商另完之款近亦派於衆商納利且有將本全攤者任意牽連伊於胡底夫以從前鹽務極盛之時商多本裕尙有虧缺如清查積欠之數千萬卽從前盛時之所遞積而貽也今則商已乏矣力已疲矣本無可借卽庫亦無可挪矣一綱之課兩年不能齊而欲其出有餘以補從前極盛

時之虧款宜其不能是不但畫餅不可以充饑
竊恐輾轉耽延愈累愈深而此事且蹶而不復
起也現在鹽臣鍾靈奉

旨核辦清查合無仰懇

聖主俯飭鍾靈督率局員將此等補帶之彌文套搭
之累款與一切浮費逐加酌核應追者追應賠
者賠各有原商毋牽累於後人應緩者緩應停
者停務協事機毋責效於眉睫其餘應刪者刪
應減者減其無著之空款徒攤無益者竝當據

實籲請

恩施子以酌免庶幾科則稍輕成本不重殷商樂於
招徠疲商亦資蘇息而鹽務可期起色臣愚昧
之見合併附陳謹

奏

道光十年十月十六日具

奏十一月十一日奉到

硃批另有旨欽此同日承准

軍機處片知

貴督具奏鹽務摺片本日奉有

諭旨交

欽差

王鼎

寶興會同

貴督查辦矣爲此知會

委署運司摺子

奏爲委署運司印務循例奏

聞事竊臣接准部咨署兩淮鹽運司王鳳生奉

旨降調當經轉行欽遵應卽委員接署惟查江蘇道

府各員如鹽巡道現署臬司蘇松糧道現陞廣

東運司上海常鎮各有急修船工河道各員或

籌放回空或勘辦要工其餘或本係兼護或業

已陞任或漕務緊要不克分身竟無可署運司

之員現當鹽務疲敝之際又未便僅委監掣同

知護理致滋玩誤查從前成案偶值乏員時上

下江亦有通融委署應卽按照酌委查有安徽
道色卜星額淳明幹練堪以委令暫署兩淮運
司印務所遺道缺由安徽撫臣鄧廷楨就近遴
員接署除分別咨照外理合會同兩淮鹽政臣
鍾靈合詞恭摺具

奏伏乞

皇上聖鑒謹

奏

道光十年十月十六日具

奏十一月十一日奉到

殊批知道了欽此

籌款與挑孟瀆等河摺子

蘇撫會稿

奏爲勘估武進縣境水利工程借動籌備銀款乘時興挑以資利賴仰祈

聖鑒事竊照蘇省瀏河孟瀆等河日久淤墊亟應興

挑經

臣

陶澍於道光八年吳淞江收工摺內附

片陳明本年正月因緩漕米石除搭運外剩米十數萬石運河枯淺難以全行帶運請畱蘇糶變暫借爲挑浚瀏河孟瀆河之用攤徵歸款

奏蒙

俞允嗣於覆奏緩漕分別搭運糶變數目摺內聲明

孟瀆河及相近之得勝河澡港河多有淤塞應
須一併辦理或與瀏河同時併舉或先後興挑
熟籌另議另行奏辦於本年閏四月間

奏蒙

聖鑒在案查常州府屬武進縣境運河之北有孟瀆
得勝澡港三河皆南通運河北達大江旱則引
江潮以濟運灌田并可直達無錫金匱宜興荆
溪各縣以資接濟如遇水潦卽宣導入江不致
壅溢爲患實爲各屬水利要道惟孟瀆河自嘉
慶二十年興挑得勝河自嘉慶十一年興挑後

均已湮塞不通濠港河自乾隆三十年挑辦至今已越六十餘年亦久經淤墊經臣陶澍暨臣

梁章鉅先後親往勘明數十里之遙竝無江湖灌輸水泉滋潤現在農田受困民望孔殷實爲刻不可緩之工較之瀏河尤應先行興辦茲據署蘇州布政使衍慶常鎮道劉名載會詳據調署常州府知府趙光祿武進縣知縣程士偉陽湖縣知縣廖鴻苞會勘得孟瀆一河估需土方夫工例價津貼連壩座工料共銀一十三萬四千五百七十兩零又因孟河舊口漲有老沙難

於開挖改開超瓢港出口通江應行挖廢沙田
拆移草房遷讓墳地共需銀二千九百六十三
兩零竝於孟河中間添建閘座需銀一萬八千
八百六十二兩零又得勝河估需例價及津貼
等銀三萬六千九百三十九兩零濠港河估需
例價及津貼等銀一萬三千三百八十三兩零
以上三河共需工費銀二十萬六千七百餘兩
選舉董事余保純等分段領銀挑辦官爲稽察
所需工費銀兩議請分作十成照康熙十九年
鄰縣協濟成案歸於武進陽湖無錫金匱宜興

荆溪六縣攤徵內武進陽湖二縣共攤五成無錫金匱宜興荆溪四縣分攤五成各分限十年按照條銀徵還歸款竝據各該縣以輿情允洽出具印結詳送司道覆加查勘委無浮冒查糶變緩漕米價已據各屬全數解存司庫銀二十六萬餘兩所有挑浚孟瀆得勝澡港三河工費銀二十萬六千七百餘兩卽請於米價銀內按數借給分作十年攤徵還款買米搭運仍俟工竣將用過銀兩造冊報銷至此次挑河工程較大在工委員人等以及挑夫搭蓬等項一切雜

費應請循照歷辦成案在於工價內每兩扣平五分爲經費之用詳請具

奏前來臣等查現准戶部咨稱各項工程概行停止不得奏請興修惟武進縣孟瀆得勝澡港三河淤塞已久先經奏明係不可緩之工且所借米價將來須攤徵歸款並非動項開銷業已籌備銀款欽奉

允准與部行停工之後奏請者有間仰懇

皇上天恩俯准仍行舉辦乘此冬令興工所有估需工費等項銀二十萬六千七百餘兩經臣等細

加覆核實無浮冒應請卽於

奏准緩漕米價銀內動支借給飭令該地方官督
率董事實力興辦臣等督飭司道等隨時查察
俟工竣後親臨驗收務使工不虛糜銀歸實用
以仰副

聖主惠徧農田永資利賴之至意所借銀兩應如府
縣所議循照舊案歸於武進陽湖無錫金匱宜
興荆溪六縣分別攤徵歸款容另取估計攤徵
各冊結分別

題咨至此此外尙餘米價銀五萬餘兩應照

奏定之案存俟籌辦瀏河奏借工用所有先行估
挑武進縣孟瀆等河及借動銀款緣由謹合詞
恭摺具

奏伏乞

皇上聖鑒訓示謹

奏

道光十年十月十八日具

奏十一月二十日奉到

硃批另有旨欽此同日奉到道光十年十一月初六
日內閣奉

上諭陶澍等奏勘估武進縣境水利工程借動籌備銀款一摺江蘇武進縣境孟瀆得勝澡港三河日久淤墊亟應興挑前經該督等奏明係刻不可緩之工業已籌備銀款與部行停工之後奏請者有間著照所請所有估需工費等項銀二十萬六千七百餘兩准其在於奏准緩漕米價銀內動支借給該督等卽飭令該地方官督率董事實力興辦並飭司道等隨時查察務使工不虛糜銀歸實用工竣該督等親往驗收所借銀兩着循照舊案歸於武進等六縣分別攤徵歸款此外尙餘米價銀

五萬餘兩存俟籌辦瀏河工用該部知道欽此

藩司告請終養摺子

奏爲藩司親老病亟驚悸難安據情

奏懇

聖恩俯准開缺回籍省視并遴員接署藩篆恭摺馳

奏請

旨簡員補放以重職守仰祈

聖鑒事據江寧藩司賀長齡詳稱親母嚴氏現年七

十七歲曾於山西學政及南昌知府任內兩次

迎養迨調任江寧藩司因母氏年力就衰兼之

素有怔忡病症不時舉發未能就養仍回湖南

本籍近時舊恙舉發更勤并添氣促腹脹諸症連日接到家信病勢益增數夕不能安寢醫藥無效光景沉劇聞信之下方寸脊亂驚悸難安恐於公事有誤詳請代

奏開缺回籍省視等情臣查藩司賀長齡居心正大辦事精詳體察屬吏督催錢糧事事竭力認真正資臂助惟該司自接家信後一聞母病沉篤兩地心懸遂致寢食俱廢若仍令其在任辦事既不能遂其將母之私情亦不能期其辦公之無誤且該司甫逾強仕圖効之日正長此時

親病危急情形迫切理合據情

奏懇

聖恩俯准暫行開缺回籍俾遂烏私并懇

簡員補放以重職守惟該司衙門爲錢糧總滙督徵
下忙一切正當緊要之際應卽委員接署趕緊
交代俾免疎誤查江蘇臬司衍慶現署蘇州藩
篆江寧鹽巡道葆謙現署江蘇臬篆其餘各道
均有緊務未便委署臣等往返札商新任江蘇
撫臣盧坤計月內總可抵任臣梁章鉅與江蘇
臬司衍慶卽可遞回本任爲日無幾應飭衍慶

即回臬司本任仍兼署蘇州藩篆其江寧布政使印務卽委江寧鹽巡道葆謙署理該員勤明穩練有守有爲以之署理藩篆於綜覈鉤稽足資裨益除分飭遵照外所有江寧藩篆緊要請旨簡放緣由謹循例恭摺由驛馳

奏伏乞

皇上聖鑒訓示謹

奏

道光十年十一月初五日由驛馳

奏十一月二十一日奉到

殊批另有旨欽此同日奉到道光十年十一月十三日內閣奉

上諭陶澍等奏藩司懇請開缺回籍省親一摺賀長齡准其開缺回籍省親所遺江寧布政使員缺着陸言補授欽此

會籌兩淮鹽務大概情形摺子

會稿 欽差

奏爲會籌兩淮鹽務大概情形仰祈

聖鑒事竊

臣

王鼎

臣

寶興奉

命前赴江南會同

臣

陶澍查辦淮鹺課歸場竈之法

臨行時仰蒙

聖誨諄諄

諭以堅持定見細心籌議跪聆之下曷勝欽感當卽帶同司員由天津而南途次連奉

廷寄接到嵩孚鍾靈恒榮竝

臣

陶澍縷陳鹽務各

摺又有人條陳淮鹽疲敝宜立章程及部奏竝

梁中靖各摺於十一月十一日行抵江寧省城
會同臣陶澍連日籌議兩淮漕務凋敝敗壞至
今日已成決裂之勢蓋庫貯墊佔全空欠解京
外各餉爲數甚鉅歷年虛報奏銷總商假公濟
私遮飾彌縫商人納課不前日甚一日現在每
卯竟無課餉上庫緊急應發之銀雖欲挪墊亦
無款可挪且口岸滯銷商運裹足間有領運無
非藉官行私弊端百出現屆庚寅年終尙未開
綱卽已丑一綱行銷尙不及十分之七約計兩
年銷不足一綱之鹽竈戶以鹽爲生商不收鹽

勢不能禁竈戶之透漏而私販由此益甚透私
既甚則運銷益滯官引多被私佔而劣商與商
夥商廝下至裝鹽之江船捆鹽之夫役莫不耽
耽咀嚼節節把持卽有殷商率多畏避實亦無
計招徠通網情形全屬渙散已等於停運停銷
當此山窮水盡不可收拾實非補偏救弊所能
轉機臣陶澍有兼轄鹽務之責正在萬難措手

臣王鼎臣寶興銜

命來江訪悉情形倍深感悚仰見我

皇上聰明天亶此等情形早已

洞燭於數年之前竝蒙

指示窮變通久之方毋許畏難苟安臣等敢不凜遵

聖諭虛心公酌覈實會辦惟事關改轍更張章程未

立頭緒繁多各場竈地方遠在海州通州泰州

必須履勘情形方能得有把握臣王鼎臣寶興

已委令司員張禮中等同臣陶澍所委各員一

同分往各處周履查看熟商妥籌俾無格碍而

期經久俟酌定章程再行詳細會

奏至續奉

廷寄各件容臣等逐一分款確查另行辦理所有

會辦淮鹽大概情形臣等謹先繕摺具

奏伏乞

皇上聖鑒謹

奏

再鹽務議改章程發端之始必須得人而理卽如竈戶散在各場煎鹽草蕩公私交雜清釐不嚴卽起爭端且水旱難齊或以災歉藉詞抗課其淮南二十場均係煎鹽有竈可查淮北三場鹽以晒成隨地可掃稅重則私掃必多稅輕則侵灌淮南而銷鹽路遠之區間虞缺乏非建倉

不可向來捆鹽盤壩夫役繁衆世代相沿衣食
於此一旦失業無賴必多一切查勘彈壓非循
分供職之員所能勝任其餘條目尙多必須得
人經理容俟臣陶澍逐細遴委惟現議捨舊從
新正當前後交涉之際得人尤亟兼兩淮庫項
弊端百出非得熟悉底裏之員無從釐剔查有
降調道員王鳳生前蒙

特旨署理兩淮鹽運使旋因辦理私販失宜奉

旨降四級調用例應赴部候選現在新運使楊振麟
到任需時現署運司色卜星額甫經到任一切

套搭款目遠難透澈該員王鳳生在任八月於稽查款目較爲熟諳仰懇

天恩將該員暫畱江蘇委辦場竈事件以便就近傳問核查臣等謹附片請

旨伏乞

訓示謹

奏

道光十年十一月二十四日由驛具

奏十二月初十日奉到

硃批另有旨欽此同日奉到道光十年十二月初二

日奉

上諭王鼎等奏請暫畱降調道員委辦事件等語著照所請王鳳生准其暫畱江蘇委辦場竈事件就近傳問覈查將此諭令知之欽此

積歉之區請來春接濟口糧摺于

蘇撫會稿

奏爲遵

旨查明恭摺覆

奏仰祈

聖鑒事竊照道光十年十月十二日承准軍機大臣
字寄道光十年十月初三日奉

上諭江蘇江甯等十七州縣衛積水受旱來春應否
接濟之處查明於封印前奏到等因欽此當經前
護撫臣梁章鉅恭錄轉行欽遵查明去後臣盧
坤蒞任跪讀

恩綸仰見我

皇上軫念災黎有加無已之至意接據署江寧布政使葆謙署蘇州布政使衍慶查明各州廳縣衛情形請

奏前來臣等伏查江蘇省本年各州廳縣衛被水被旱收成歉薄情形業經奏奉

恩旨緩徵錢糧茲復仰蒙

特諭垂詢臣等細加體察惟徐州府屬之沛縣坊壺等十二里連年災歉今秋又被水旱歉收雖係勘不成災惟積歉之區來春青黃不接民力不

免拮据應需接濟相應恭懇

天恩俯准將沛縣勘不成災之坊壹等十二里乏食
貧民

賞給一月口糧俾資接濟感沐

鴻慈益無既極其蘇藩司所屬太倉等州廳縣本年
雖有歉收情形尙輕毋庸查辦江藩司所屬上
元等州縣衛收成雖屬歉薄現在情形似可毋
須接濟統俟來春察看情形如有無力佃農應
需酌借籽種口糧及出易平糶之處臨時再行
查辦所有查明沛縣勘不成災之坊壹等十二

附錄卷之二
里來春應需接濟緣由謹合詞恭摺具

奏伏乞

皇上聖鑒謹

奏

道光十年十二月初五日會

奏正月初九日奉到

硃批候旨行欽此

江淮各屬熟田舊欠請分別緩徵摺子

蘇撫會稿

奏爲查明江淮等屬熟田舊欠錢糧未能同時併
納恭懇

聖恩分別緩徵以紓民力事竊照江寧淮安揚州徐
州海州五屬節年舊欠錢糧前於道光四年因
民力拮据將二年以前錢糧分年緩帶嗣復連
年災歉又於道光七八九等年將道光三年以
後積欠錢糧分別災熟

奏准緩至十年秋後分別起徵今道光十年江寧
淮安揚州徐州等屬高田被旱低田被淹除收

成款薄之區應帶舊欠前經護撫臣梁章鉅於

秋災情形案内

奏明緩徵欽奉

恩旨允准其成熟田地節年舊欠錢糧當於秋災摺

尾聲明另行專案具

奏臣盧坤到任後卽經催司飭屬趕辦去後茲據

署江寧布政使葆謙詳稱據該管府州各就所

屬地方體察情形分別應徵應緩詳請具

奏前來臣等伏查道光十年江寧淮安揚州徐州

各屬成熟田地非係毘連歉收之處卽屬連年

積歉海州屬本年雖尙有收亦係積歉之區若
以一歲之所收納節年之逋欠民力實有未逮
除上元江寧二縣應帶徵道光九年熟田尾欠
錢糧江浦縣應帶徵道光九年熟田併衛漕項
加津併九年徵剩嘉慶二十三及道光六七
等年災緩初二限尾欠銀米山陽縣請帶徵道
光九年復熟田地應徵道光八年災緩二限及
九年帶徵八年未完災緩初限地漕澗河夫工
還款學租併八年未完熟田地漕河灘等租各
款錢糧高郵州應帶徵道光八年災緩二限併

遞緩初限及九年災緩初限地漕增租等款銀
米泰州應帶徵道光八年初限未完銀米併九
年熟田錢糧東臺縣應帶徵道光八年災緩初
二限銀米江都縣應帶徵道光九年隨奏銀兩
寶應縣應帶徵東鄉道光六年二限併南北鄉
七年二限及東鄉七年初限地漕銀米銅山縣
應帶徵道光四年舊欠銀米併水利等款沛縣
應帶徵道光九年復熟併五年熟田及復熟初
二限暨七年熟田民欠錢糧蕭縣應帶徵道光
二年舊欠錢漕邳州應帶徵道光二年民賦地

漕銀兩米麥攤徵堰工併該年併衛黃河北岸
各營未完銀米麥石及黃河南岸各營嘉慶二
十四年銀兩米麥宿遷縣應帶徵連熟之區道
光八年二限併該年初限未完及攤徵民便等
河水利銀兩併上年歉收今年復熟之仁四六
安一二北一等圖道光八年初限地漕銀米及
攤徵民便等河初限銀兩睢寧縣應帶徵嘉慶
二十三年併道光元年積欠及道光八年初二
限銀米沐陽縣應帶徵道光八年初限未完併
九年地漕土方河租蘆葦草場等款銀米贛榆

縣應帶徵道光九年未完地丁漕價銀兩以上各款均請仍行照常帶徵外合無仰懇

皇上天恩俯准將上元縣嘉慶二十三年起至道光七年止各款未完災熟銀米併道光八年尾欠及九年災緩初限等款銀米暨嘉慶十六十九二十年等年加津銀兩江寧縣嘉慶二十三年起至道光七年災熟地漕各款銀米併道光九年災緩初限銀米及嘉慶二十二年以前加津銀兩句容縣嘉慶二十三年起至道光九年止災熟地漕各款銀米江浦縣嘉慶二十五年及

道光元三四五等年積欠錢糧併嘉慶十三十四十九二十等年加津銀兩六合縣嘉慶二十三年起至道光九年止民衛地漕等款銀米併嘉慶二十二以前各年加津銀兩山陽縣道光九年被歉本年復熟應帶道光八九兩年災緩併七年熟田未完錢糧六年河灘租銀及七年帶徵六年災緩未完地漕河灘租澗涇河夫工學租等款錢糧阜寧縣嘉慶二十三年起至道光九年止災熟地漕蘆課攤租復賦折漕灘徵救生河工併嘉慶二十五年及道光元年春

借籽種口糧等款清河縣嘉慶二十三年起至道光九年止地漕等款銀米併出借籽種口糧桃源縣嘉慶二十三年起至道光九年止災熟地漕價湖河灘租等款銀米鹽城縣嘉慶二十三年起至道光九年止積欠錢漕併借給籽種攤徵河工等款高郵州嘉慶二十三年起至道光七年止災熟地漕增租等款銀米及嘉慶二十二年以前增租銀兩泰州嘉慶二十三年起至道光七年止及八年二限災熟地漕銀米東臺縣嘉慶二十三年及道光三四六等年銀

米併歷年河銀江都縣嘉慶二十三年起至道光八年止災熟地漕銀米併歷徵七年蘆課銀兩甘泉儀徵二縣嘉慶二十三年起至道光九年止災熟舊欠銀米興化縣嘉慶二十三四年併道光元三四六八等年災熟地漕銀米攤徵河銀併道光二年災緩河銀寶應縣東鄉道光七年二限銀米銅山縣嘉慶二十三四五併道光元二三五六七八九等年地漕水利各款豐縣嘉慶二十三年起至道光九年止積欠地漕銀米及嘉慶二十五年併道光三年十年出

借常平倉豆沛縣嘉慶二十三、四、五年及道光
元、二、三、四、六年併千一等里五、七、八年勘不成
災未完地漕銀米等款蕭縣道光三年起至九
年止舊欠地漕銀米併水利銀兩邳州嘉慶二
十四年民賦二十五年民衛併道光元、二、年黃
河南岸及三、四、五年黃河南北岸併衛暨道光
六、八、年民衛地漕等項銀兩米麥併攤徵水利
等款宿遷縣嘉慶二十三年起至道光七年併
仁、四、六、安、一、二、北、一、等圖道光九年初限八年
二限舊欠銀米及王平庄水利銀兩睢寧縣嘉

慶二十四五併道光二三四五六七九等年舊欠錢糧米麥及攤徵水利等款海州嘉慶二十四年道光三四六七八等年地漕錢糧及河工蘆課等款併嘉慶二十五年道光四年出借常平倉糧沐陽縣嘉慶二十三年至道光七年併八年二限積欠各款銀米贛榆縣道光元年起至八年止積欠未完各款錢糧漕米併嘉慶二十五年出借常平倉麥概請緩至道光十一年秋後分別起徵以紓民力淮安大河徐州三衛隨同坐落州縣一律辦理除飭查造應徵應緩

款冊另行咨部外所有熟田舊欠錢糧未能同時併納懇請緩徵緣由謹合詞恭摺具

奏伏乞

皇上聖鑒訓示謹

奏

道光十年十二月十一日會

奏正月十五日奉到

硃批另有旨欽此同日奉到道光十年十二月二十七日內閣奉

上諭陶澍等奏江淮等屬熟田舊欠錢糧未能同時

併納懇恩分別緩徵一摺江蘇省江寧淮安揚州
徐州海州等屬被旱被淹除收成歉薄之區應帶
徵舊欠業經緩徵外其成熟田地據該督等查明
非係毘連歉收之區卽屬連年積歉以一歲之所
收納節年之逋欠民力實有未逮着照所請除各
屬應行帶徵各款仍照常帶徵外着加恩將上元
縣嘉慶二十三年起至道光七年止各款未完災
熟銀米併道光八年尾欠及九年災緩初限等款
銀米暨嘉慶十六十九二十等年加津銀兩江寧
縣嘉慶二十三年起至道光七年災熟地漕各款

四書子方人勇取卷三
三三
銀米併道光九年災緩初限銀米及嘉慶二十二年以前加津銀兩句容縣嘉慶二十三年起至道光九年止災熟地漕各款銀米江浦縣嘉慶二十五年及道光元三四五等年積欠錢糧併嘉慶二十三十四十九二十等年加津銀兩六合縣嘉慶二十三年起至道光九年止民衛地漕等款銀米併嘉慶二十二以前各年加津銀兩山陽縣道光九年被歉本年復熟應帶道光八九兩年災緩併七年熟田未完錢糧六年河灘租銀及七年帶徵六年災緩未完地漕河灘租澗涇河夫工學租等

款錢糧阜寧縣嘉慶二十三年起至道光九年止
災熟地漕蘆課灘租復賦折漕攤徵救生河工併
嘉慶二十五年及道光元年春借籽種口糧等款
清河縣嘉慶二十三年起至道光九年止地漕等
款銀米併出借籽種口糧桃源縣嘉慶二十三年
起至道光九年止災熟地漕漕價湖河灘租等款
銀米鹽城縣嘉慶二十三年起至道光九年止積
欠錢漕併借給籽種攤徵河工等款高郵州嘉慶
二十三年起至道光七年止災熟地漕增租等款
銀米及嘉慶二十二年以前增租銀兩泰州嘉慶

二十三年起至道光七年止及八年二限災熟地
漕銀米東臺縣嘉慶二十三年及道光三四六等
年銀米併歷年河銀江都縣嘉慶二十三年起至
道光八年止災熟地漕銀米併歷徵七年蘆課銀
兩甘泉儀徵二縣嘉慶二十三年起至道光九年
止災熟舊欠銀米興化縣嘉慶二十三四年併
道光元三四六八等年災熟地漕銀米攤徵河銀
併道光二年災緩河銀寶應縣東鄉道光七年二
限銀米銅山縣嘉慶二十三四年併道光元二三
五六七八九等年地漕水利各款豐縣嘉慶二十

三年起至道光九年止積欠地漕銀米及嘉慶二十五年併道光三年十年出借常平倉豆沛縣嘉慶二十三四年及道光元二三四六年併等里五七八年勘不成災未完地漕銀米等款蕭縣道光三年起至九年止舊欠地漕銀米併水利銀兩邳州嘉慶二十四年民賦二十五年民衛併道光元二年黃河南岸及三四五年黃河南北岸併衛暨道光六八年民衛地漕等項銀兩米麥併攤徵水利等款宿遷縣嘉慶二十三年起至道光七年併仁四六安一二北一等圖道光九年初限

八年二限舊欠銀米及王平庄水利銀兩睢寧縣
嘉慶二十四五併道光二三四五六七九等年舊
欠錢糧米麥及攤徵水利等款海州嘉慶二十四
年道光三四六七八等年地漕錢糧及河工蘆課
等款併嘉慶二十五年道光四年出借常平倉糧
沐陽縣嘉慶二十三年至道光七年併八年二限
積欠各款銀米贛榆縣道光元年起至八年止積
欠未完各款錢糧漕米併嘉慶二十五年出借常
平倉麥以上均緩至道光十一年秋後分別起徵
淮安大河徐州三衛隨同坐落州縣一律辦理以

紓民力該部知道欽此

兩淮運庫墊估虧缺緣由摺子

欽差會稿

奏爲遵

旨查明兩淮運庫墊估虧缺各項緣由據實覆

奏仰祈

聖鑒事竊臣等接奉

廷寄

諭旨發下臣陶澍縷陳淮鹺積弊鈔摺一件併夾片

又鹽政臣鍾靈陳奏兩淮庫貯墊估全空應解

京外各餉及外支各款層遞積壓鈔摺一件又

欽奉

上諭據恒棨奏兩淮欠解淮關鹽鈔銀兩計未解到
七季鈔銀一萬七千五百兩着查明因何遲延據
實具奏等因欽此伏查兩淮正雜錢糧本係按綱
徵收而外支各款則係按年支用如能一綱之
鹽年額年銷則運庫解支自可年清年款無如
口岸滯銷以後一綱之內均不能銷足一綱之
引正課則銃引分攤而雜支款目必須按年支
發勢不容緩數十年來庫款之前後套搭挪墊
糾纏以致疊次清查虧短銀數千萬之多其弊
皆由於此自道光二年清查案內積欠銀三千

六百八十七萬餘兩奏請推展自道光二十三年起分綱攤帶復於道光八年丙子銃引案內又查出積欠銀一千一百七十五萬兩除戊子己丑兩綱解過甘餉銀二十五萬兩尚有庚寅綱起應解甘餉銀八十萬兩甲午綱起分解各衙門銀一百二十萬兩其餘九百五十萬二千一百餘兩係自道光十三年起分十綱帶徵亦經奏明在案上年經前鹽臣福森奏請立限清查截至道光九年十月初一日共查出墊佔銀七百七十九萬七千餘兩除分別歸補撥抵外

實欠銀四百九十九萬餘兩除在外支銷二百
六萬餘兩實欠正雜各款銀二百九十二萬五
千餘兩已據該運司查明具詳應由新鹽政臣
鍾靈覆核具奏今已丑綱自九年三月開綱起
截至本年十月止已完綱引七分應徵正雜錢
糧四百二十萬一千餘兩除解支過銀三百六
十萬兩計應存庫銀五十九萬餘兩已爲庚寅
綱外支各款借用又借用戊子等殘綱銀三十
六萬餘兩是庚寅尙未開綱而本年應支緊款
已挪墊已丑等綱銀八十餘萬兩現在十一十

二兩月仍有應支緊款約二三十萬兩此前後
套搭實情鹽政鍾靈所奏庫貯墊佔全空者職
此之故卽如前准關監督臣恒棨所奏欠解關
鈔銀一萬七千五百兩內戊子綱欠解三季銀
七千五百兩係已入清查之款已丑綱欠銀五
千兩因本綱之引未經銷完是以不能全解庚
寅尙未開綱是以欠銀五千兩要皆因鹽壅滯
銷無計可施是以積欠纍纍此各省帑息匣費
懸欠未解之款不可枚舉非止淮關一處卽庚
寅及己丑餘引尙有未支銀一百餘萬兩係在

清查以後以上各款除道光二年清查積欠銀兩已邀

恩展至二十三年帶徵外所有丙丁銃引案内欠解正雜及鹽規匣費帑利等銀共一千一百餘萬兩前限於道光十年十三年十四年分綱帶攤各項又上年清查欠解正雜及鹽規匣費帑利等款銀二百九十餘萬兩及本年外支墊佔銀九十餘萬兩皆係歷年以來鹽壅課滯糾纏墊佔所致茲當整頓伊始若再仍前敷衍留此虛名必致又套入辛卯綱內輾轉騰挪則前欠未

清後虧踵至不惟無補於既往併難期效於將來計惟有將前項積欠同庚寅未行綱引及已丑未完三分一併暫緩攤帶俟將來鹽引暢銷後察看情形再行奏請分綱帶徵歸款應請自道光十一年正月辛卯開綱日起截清前積以斷葛藤庶可從新整理漸復舊規此外另有未銷印本一款係積年因解餉急需有預納減納貼息等名目由商墊用運庫給與用印手本准其通融抵課致成懸款辦理原屬非宜第官非一任事非一時從前既給有印本遞行抵納而

多估一分虛抵之銀卽暗虧一分現綱之課前
鹽臣福森議於己丑庚寅兩綱徵帶以完舊虧
而補現課除己丑綱已徵還銀六十萬兩仍未
徵還銀九十餘萬兩此項雖係套搭不得不循
案歸補惟銀數必須稍緩無許估碍新綱應於
辛卯壬辰癸巳展分三綱攤補以清宿累其餘
附貯各款及各官承領未解銀兩各商承變人
參東珠皮張未解價銀併奉

旨追賠未繳各項均應查明原欠各官商名下勒限
追繳以歸有着如此分別應緩應追核實辦理

庶不致積碍新綱俾資整頓所有臣等查明
務積弊運庫墊估及欠解淮關鹽鈔各緣由理
合據實覆

奏伏乞

皇上聖鑒至嵩孚奏請委員嚴查脚私之弊已於現
議章程內籌辦查禁毋庸另議合併聲明謹

奏

道光十年十二月十三日由驛具

奏十二月二十九日奉到

硃批戶部速議具奏欽此

戶部遵

旨速議具奏事據

欽差大臣王鼎寶興兩江總督陶澍等會奏查明兩
淮運庫墊估虧缺各緣由據實覆奏一摺道光
十年十二月二十一日奉

硃批戶部速議具奏欽此欽遵於道光十年十二月

二十四日由內閣抄出到部據原奏內稱

云

等語臣等覆查兩淮歷年積欠銀兩現據

欽差大臣王鼎等會同核議請將道光二年積欠銀
三千六百餘萬兩仍照原限於道光二十三年

帶徵其八年統引案內欠解銀一千一百餘萬兩九年清查墊估銀二百九十餘萬兩本年外支墊估銀九十餘萬兩併庚寅未完綱引及己丑未完三分通共銀二千餘萬兩自道光十一年辛卯開綱一併暫緩攤帶俟將來鹽引暢銷再行帶徵歸款等語臣等查兩淮鹺務做壞總以糾纏墊估爲辭嘉慶二十五年及道光三年

曾蒙

恩施格外將玉

貢商捐共銀六百七十餘萬兩悉行豁免自應大

有起色且近年屢經調劑仍復疲玩因循意存
嘗試馴至不可挽治卽如浮費一款之開銷頻
年正項尙不能符額其浮費早應裁撤是私款
一絲未革公項任意擱滯實屬不成事體今更
定章程之始旣將前項各款銀五千餘萬兩分
別停緩自明年正月辛卯開綱日起截清前積
整復舊規自應無難辦理惟經此番查辦是否
卽可暢銷明年辛卯綱應徵正雜及內外帑利
等銀其數若干是否實能如數徵完所有欠款
究係何年始能歸補原奏內未經聲叙應令兩

江總督將歷年積欠銀兩核明確數造冊送部
併將辛卯綱應徵銀款數目分晰查明一併造
冊先行送部俟該年奏銷時臣部核其所完銀
數能否年額年清再行核議辦理又所稱附貯
各款及各官承領未解銀兩各商未解價銀併
奉

旨追賠各項查明勒限追繳一節其附貯銀兩係屬
何款其有若干及在何官何商名下勒追臣部
無從查核應令該督詳悉聲明報部以憑核辦
至八年統引案內查出積欠銀一千一百餘萬

兩經臣部籌撥新疆經費奏明將新懸墊款內
劃出銀一百萬兩自己丑年起至癸巳年止每
年徵銀二十萬兩解赴新疆所有己丑年經費
銀二十萬兩已據報解其庚辛壬癸四年應解
銀兩自應如數解交今復彙人積欠之內一併
停緩是新疆經費卽屬短缺又須另行籌撥臣
部碍難議准應仍令按年如數解往以應要需
至未銷印本一款向未報明有案應令一併查
明報部以備稽核所有臣等遵

旨速議緣由理合恭摺具

奏是否有當伏乞

皇上聖鑒謹

奏請

旨

道光十年十二月二十七日具奏本日奉

旨依議欽此

會籌鹽務章程摺子

欽差
會稿

奏爲會籌兩淮鹽務疲敝情形擬仍循舊章大加
釐剔嚴定條款以肅鹽政仰祈

聖鑒事竊

臣

王鼎

臣

寶興奉

命前來江南會同臣陶澍籌辦兩淮鹽務會將查出
庫貯墊佔虛報奏銷商運稽遲竈私透漏各實
情併分派司員會同地方委員分赴各場履勘
緣由奏報在案臣等一面將淮綱全局詳加綜
核逐細鉤稽力求課歸場竈之法惟是兩淮歲
徵正雜課銀及帑利各款四百餘萬兩絲毫皆

國帑攸關既宜籌利所從生必須防弊所自伏因
思責成場竈大要有三而皆有窒碍之處一由
竈丁起科淮南以鑷煎鹽淮北以池晒鹽今按
池鑷定課每鑷每池約徵銀百餘兩竈丁皆瀕
海貧民若令先納課而後賣鹽則力有未逮抑
令先賣鹽而後納課設遇歉產之日勢必課宕
丁逃且場鹽每斤向賣制錢一二文三四文不
等今加入課銀六釐是課重本輕私賣但及交
課之半竈丁即獲大利販商卽省重貲仍難免
透私之弊此竈丁起科之難以遽行也一由垣

商納課招徠殷商合其認課包納竈鹽悉歸該商經理出賣寓散於整較爲扼要惟兩淮池繳半係竈產以已業而聽命商人情必不願况商人惟利是視秤收則勒以重斤借貸則要以重息竈戶狃于售私職此之故竈不樂以鹽歸垣商亦必無貲完課此商垣納課之亦難遽行也

一由場官收稅就各場產鹽引額攤定課額商販先向場大使報明認買斤數照額納課赴各竈配買鹽斤如此官爲經理似覺核實無如計算產鹽最多之伍祐等場照引定課應徵銀六

十餘萬兩卽等而下之如梁塚等場亦應徵銀二十餘萬兩雖淮潁等關蘇松各縣錢糧不及此數鹽場徵員豈能任此巨帑况試行之初額難懸定若聽其儘收儘解難保不匿報侵欺兼之場署多在海濱旣無城郭之防又乏營汛之衛徵解亦恐致疎虞此場官收稅之亦屬難行也至於就井抽稅滇省雖有成效但兩淮情形與滇省不同滇省鹽井二十四區課額三十餘萬兩防邏易周課程亦易足兩淮場地延袤八百里水陸交通非滇省一井一官卽能查察可

比且商運先課後鹽額亦十倍滇省未易仿照
辦理茲據司員及委員等各以查勘場窳苦累
情形陸續稟覆臣等以事關創始必須計出萬
全連日公同籌酌竭誠殫思期於變通盡利而
利之所在弊卽因之卽使先爲試辦而清窳僉
商改官變法非一二年規模不能想定小民難
與圖始雖廣爲曉示亦恐觀望不前卽商販通
行又必南侵閩浙綱鹽北侵蘆潞綱鹽若不統
各省鹺務通盤籌畫實不免此羸彼絀之虞况
此一二年中課額未可常懸場鹽未可停捆各

岸食鹽更未可久缺假令試行盡善固可掃除積弊設或稍有未協卽難再復舊章伏思我

朝淮鹽定制杜透漏則有垣竈之稽查防捆夾則有壩所之掣摯絕船私則脚價毋許折給通綱引則口岸無事輪編至於筦庫核自運司無估墊通挪之弊緝私責在弁汛嚴游巡堵截之方逐層防範至周至密果能實力奉行自不致有流弊無如相率因循積重難返此非法之做人實廢法請卽淮鹽弊之大者論之一曰浮費歲徵正襍各款以產鹽分數核算行銷盡屬有

餘乃外解外支各項復有數百餘萬兩之多其中如鹽政之辦貢辦公及漢口之岸費揚州之活支乏商之月摺等項甚至一切官私酬應均列入成案開銷似此積習相沿無怪成本日形吃重二日夾帶兩淮正引三百六十四斤現在各場捆鹽多者幾至加倍此商人引鹽之夾帶也其餘商夥商廝舵工水手無不各有重斤私捆攪襍多裝是以沿途則有買硃跑風名目到岸則有過籠蒸糕情弊併有糧船影帶之食鹽商巡報獲之功鹽無非假公行私將無課之鹽

先儘售賣綱食各引安得不滯三曰私販淮南
之老虎頸及深江孔家涵淮北之錢家集古寨
及新壩龍苴城等處向爲梟徒盤踞馬頭鹽務
中雖有緝捕經費之名而汛兵巡役往往得規
庇縱且淮鹽行銷六省地方遼濶如湖北之荆
襄一帶則有潞鹽之私江西之南贛一帶則有
粵鹽之私他若河南之蘆私安徽之浙私皆由
各省越境透漏占礙淮綱其害又不獨在梟販
此皆淮綱受病之處而推求致病根源實因視
成法爲具文久之遂渙散而不可收拾誠非區

區補偏救弊所能轉機惟有將舊章大加釐剔
現計革除浮費銀二百六十萬兩成本既輕鹽
價自減儘可敵私民間亦何樂蹈買私之罪將
私販不緝而自除而且清庫款革總商以杜侵
漁之漸定秤桶編船號以絕影射之萌挑河道
散輪規以暢運銷之路酌帶銷緩積欠以清套
墊之源使射利者無可借端欠課者無從藉口
似較課歸場窳之法確有舊轍可循謹分爲十
五條另繕清單恭呈

御覽伏候

欽定

臣王鼎臣寶興經此次釐定條款之後臣陶澍

原有兼轄鹽務之責隨時隨事力加整頓倘仍有透私墮課各情弊立將玩誤之官弁商人盡法嚴懲示儆斷不致偶涉姑容如此行之數月定有起色查現在已丑綱未銷之鹽尚有三分庚寅全綱並未啟銷應自辛卯綱起卽照新定條款辦理第不劃清界限仍易啟套搭之弊應請前項未銷之鹽隨時帶銷如遇銷數通暢卽援照從前辦過提綱成案儘數補銷毋任積壓再淮南北各場存積之鹽甚多數月以來商不

收運以致場竈苦累課帑支絀此時已屆年終
辛卯立應開綱應嚴飭商人趕緊買運交課如
有藉端延宕輕則立予叅革重則嚴行治罪總
期弊去太甚法在必行以仰副

聖主飭綱裕課除弊便民之至意所有臣等會同籌
議緣由理合繕摺具

奏伏乞

皇上聖鑒

訓示遵行謹

奏

謹將擬定兩淮鹽務章程十五條恭呈

御覽

一裁減浮費也兩淮襍費有外支辦貢辦公等款在科則內帶徵爲文武衙門公費併一切善舉辛工役食襍費等用踵事遞增益多糜費除養廉兵餉水脚部飯等項共銀三十三萬餘兩向係作正開銷無可刪減此外如普濟育嬰書院義學等項亦應酌從其舊惟各堂董事濫厠多名與書樓務本堂孝廉堂等處歲需銀二十餘萬兩俱係情面仗助並非

緊款此時無項可發應概行裁汰其餘各衙門公費及鹽政運司員下書役辛工紙飯併乏商月摺等項每年共需銀八十餘萬兩難免浮冒應分別大加刪除其實存應領之款亦酌減十分之四五不准商人溢領私增致滋浮濫有累成本再漢口地方乃商船聚售分銷湖南北引鹽之所各岸商按引捐銀專爲當事各衙門公費等用近因該岸商夥恣意浮開併濫爲酬應每引捐至一兩三錢之多雖不徵於科則而本重價昂以致滯銷絀

課實爲淮綱之患應大加刪減每引只准捐銀四錢仍由鹽道核數詳明各院立案永遠不准加增以上揚商漢岸各費共刪減銀一百一十餘萬兩科則成本庶得少輕矣

一刪減窩價也商運請引行鹽必先向有窩之家出價買單然後赴司納課通計淮鹽有根窩者一百五十二萬五千九百餘引其無根窩而自用本名請引者亦十八萬二千五百餘引足知行鹽原不須用窩單乃有窩之家展轉私售如操市券以一紙虛根先正課而

坐享厚利以致運商成本加重昂價病民本
應全行裁革惟念淮商受

國家豢養已久亦如糧船之有旗丁姑准留此
根名每綱每引酌給銀一錢二分以示格外
體卹如有把持希冀增價卽追單銷燬永遠
裁革嗣後請引只准按綱給單不准預請數
綱以杜牽混其各處口岸有虛底估據租厘
綱利者查出一體裁革另僉殷商承辦以歸
核實而輕成本

一刪減繁文也領運舊例有請呈加三項名目

國朝文獻通考卷三百三十三
三十三
又有平上去入四處截角名目其餘硃單皮
票梳封等名目甚多不可殫述以致運司衙
門書吏多至十九房商人辦運請引文書輟
轉至十一次之繁經鹽務大小衙門十二處
節節稽查而並無稽查之實徒爲需索陋規
之具應交運司悉心查覆可刪者刪可併者
併以速商運而免羈延

一慎重出納也商課入庫向來不分正雜籠統
動支迨遇緊餉應解百計挪湊因有預納減
納貼色貼息及印本抵課等弊庫款之糾纏

虧耗一空皆由於此嗣後永禁前項名目將正項貯庫專候部撥及應解正款其餘雜費另貯外庫不許將正款挪墊更不許商人干預庫項以免弊混

一裁選商總也淮南設有總商原以籌辦通綱公事趕課滾總爲衆商表率近則公事飭議罔應錢糧滾總不前惟辦公之項按月分管領辦任意冒開每年於定額外仍以不敷名目溢領數十萬不等且有運鹽無幾濫充總商藉以營私獲利實屬把持應請於現在各

商內擇其公正醇謹行鹽最多者數人作爲
辦事之商遇有公事飭令核議經辦至辦公
一項悉照減定額數指款請領不准冒濫加
增亦不准下立總商名目永杜弊端

一酌核帶銷也庚寅綱引現已冬杪尙未開綱
行運而已丑仍有未完積引三分明年辛卯
卽應開綱斷不能以一年而行三綱之鹽若
再推展敷衍徒留虛名課仍無着且庫項解
支各款又復糾纏套搭必至仍前挪掩奏銷
難期核實應請於道光十一年正月卽開辛

卯本綱所有庚寅未行綱引及己丑未完積引隨時帶銷另款存貯撥解俟將來辦有成效遇暢銷提綱之時仍將未完前引補銷以符原額

一積欠宜緩也查淮南北商欠纍纍前後不下四千餘萬業於連次清查銃引案內奏明分綱帶補尙有現在清查未經奏出者此項積欠爲數甚鉅若卽按綱帶徵仍啟套搭之根無從劃清界限佔礙新綱地步應分別停緩俟將來課款充裕時再行歸補以免牽掣內

惟帑本利息一項因各處需用孔亟不能短少仍須在新綱引內攤徵利息以應急需

一宜恤竈丁也竈戶煎丁濱海窮民最爲艱苦宜加體恤查收鹽桶秤舊有定制近來場商每以大桶重秤任意浮收勒措致竈戶以交官鹽爲累而樂於透私應請嗣後由運使衙門驗烙桶秤頒發不准私製毋許場商再有前項情弊責成場官隨時稽查仍嚴督竈丁按埽繳以編保甲復火伏以稽額煎俾清場私之源再提泰壩掣廳批驗所各秤一律較

准烙發飭令認真秤驗併於運河要道之北橋處所運司親蒞抽秤如有格外重劬卽將秤驗各官叅撤示懲

一實給船價也運鹽原有定例水脚近爲埠頭串同商夥商厮從中勒扣該船戶亦意圖帶私甘心忍受且有出錢買裝者遂致脚私日恣應將水脚例價照實核發毋許商厮輩絲毫尅扣併明定章程將各船挨次編號連環保結不准仍蹈買裝舊習亦不准盜賣商鹽查出嚴行懲辦並將該埠保一併治罪

一嚴究淹消也鹽船遠涉長江遭風失險亦事
所間有向例原有津貼無非格外體恤併准
批補沉失之鹽免其輸課近以守輪待售時
日遷延在後各船多有盜賣將空船鑿沉其
弊多由船戶而運商利有津貼批補且可分
裝多船越輪先售以致轉相效尤竟以體恤
爲作弊之端實堪痛恨嗣後淹消之案應停
其津貼准其補運不准免課庶奸商無所覬
覷如船戶盜賣捏報淹消查出照例嚴懲治
罪

一疏浚運道也通泰兩屬運河淤墊緯堤倒塌
遇西水下注一片汪洋待風而行久晴輒形
淺渴商鹽盤剝分裝每引花費至數錢且坑
延拋散以致遲遲違限成法廢弛儀徵河道
雖於道光三年大挑嗣因江湖浸灌潮落沙
沉又復淤阻均應確切勘估實力挑浚深通
卽以挑出之土培築大堤俾速轉運以輕商
本

一添置岸店也沿江一帶安慶以下皆有專商
領運自武昌下游之興國大冶等及黃州府

屬各州縣至江西之彭澤德化湖口等縣江
而遠至八百餘里向自儀徵運鹽至漢口折
回轉售於各岸往返徒勞脚費加重以致引
地爲江船糧船各私所隱佔應飭鹽道查明
各該處口岸每年額銷引若干將水程預爲
給發僉商運赴該處俾水販就近領賣水程
照例彙繳以免越運漢口致多轉折引鹽自
可廣銷

一 亟散輪規也船至漢西兩岸本以速銷爲貴
封輪挨賣其初本爲大商擡價迨守候太久

遂致船戶盜賣搬沙灌楸過籠蒸糕甚至沉
船放火百弊叢生且成本佔擱轉運更遲而
大商亦病不止小商坐困矣查道光二年間
辦理散輪行之有效自道光七年於三釐河
費加價案內復請整輪不及三年敗壞至此
今加價三釐已奉

旨恩免自應散輪以符原奏現聞漢岸滯鹽不下二
千萬祖大礙新綱亟須設法疏銷應派公正
之員駐守漢岸會同鹽道辦理散輪事宜不
許假手岸商以杜弊混嗣後不許再有整輪

免致滯銷

一整飭紀綱也鹽務之官志在飽煖從無甄別不遵體制或與商人聯姻換帖或與商人夥本行鹽最爲劣習嗣後有似此者應卽呈請迴避如有朦混查出嚴行叅辦其各場分司大使亦應照州縣之例察看人地隨時調換務令相宜至各省鹽道向因隔屬呼應不靈除河南引地鹽歸糧道兼理僅此一府三州仍從其舊外應請將湖北鹽道督銷功過歸兼轄鹽務之總督衙門考核會同該省督撫

具奏以專責成而肅紀綱

一 淮北宜另籌也查淮北情形與淮南迥異淮南患於積鹽不銷淮北患於無鹽到岸緣淮北三場僻在海州每年一綱之鹽須於秋後漕船過竣開放雙金剛乘北運河下注之水趕運全完爲一年運岸之需科則每引僅一兩一錢無可再減惟商本甚重如五壩十損水陸節節盤駁最爲繁重鉤損人等視爲恒業一經更張卽至恃衆滋事兼以各岸浮費甚多及商夥濫銷近年商力疲乏已極能運

秋單者僅止三數家其餘各商雖有認岸之名終年無鹽到岸小民無官鹽可食反仰給於私梟私鹽愈充則岸商益形裹足從前尙借助於淮南今商力已疲自願不暇無可接濟淮北之商竟成坐困本年由運庫發銀十四萬兩收買約有四萬引趕運出閘而商運之鹽僅二萬餘引竈戶積鹽不售無計資生饑寒交迫之餘豈能坐而待斃計惟速籌補救之法除廬州府屬及滁州來安各口岸改由江運者尙可與淮南食岸一律整飭外至

湖運各岸近年額引銷不及半現商惟一二
苟延殷商畏累觀望數十年來迄無良法必
得設法改道以清其源一面革退各岸乏商
另招股商先籌官運以爲倡導之機一切章
程另容次第籌辦惟目下情形鹽積如山無
商收買各窰紛紛籲求調劑勢不能任其枵
腹待售應請先行籌款收買窰鹽以濟口食
其鹽存貯各場俟來年秋單發運之時查照
銷滯各岸遴委賢員領運售鹽繳價歸還原
本不致虛懸

以上各條謹就臣等現查所見籌議章程其餘未盡事宜應隨時察核分別奏咨辦理

道光十年十二月十三日由驛具

奏於十二月二十九日奉到

硃批另有旨欽此同日奉到道光十年十二月二十一日內閣奉

上諭據王鼎寶興奏請將兩淮鹽務改歸總督管理又會同該督籌議鹽務章程各一摺已明降諭旨將鹽務改歸該督管理併裁撤兩淮鹽政一缺所有會同酌定鹽務章程十五條均照所議行其餘

未盡事宜仍着隨時察核分別奏咨辦理等因欽
此

委臬司兼署藩篆摺子

奏道光十年十二月初八日接准部咨欽奉

上諭湖廣總督著盧坤補授江蘇巡撫著程祖洛調補未到任以前江蘇巡撫著梁章鉅護理等因欽此所遺蘇州藩篆係全省錢糧總匯亟須委員接署查江蘇臬司衍慶屢次署理藩篆辦理裕如堪以就近兼署除檄飭遵照外理合附摺具奏伏乞

皇上聖鑒謹

奏

道光十年十二月二十五日具

奏道光十一年正月二十七日奉到

硃批覽欽此